

十六國春秋



中華書局

十六國春秋

崔鴻撰

812

1766

叢書集成初編

十六國春秋

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

十六國春秋

此據漢魏叢書本
排印初編各叢書
僅有此本

十六國春秋目錄

前趙錄

劉淵

劉聰

劉曜

後趙錄

石勒

石宏

石虎

石閔

前秦錄

符洪

符健

符生

十六國春秋 目錄

符丕

符登

後秦錄

姚弋仲

姚襄

姚萇

姚興

姚泓

蜀錄

李特

李流

李雄

李期

李壽

李勢

前涼錄

張軌

張宴

張駿

張重

張祚

張元靖

張天錫

西涼錄

李暠

李歆

南涼錄

禿髮烏孤

罽檀利鹿

北涼錄

十六國春秋 目錄

沮渠蒙遜

後涼錄

呂光

呂纂

呂隆

前燕錄

慕容廆

慕容皝

慕容皝

慕容暉

後燕錄

慕容垂

慕容寶

慕容盛

慕容熙

慕容雲

南燕錄

慕容德

慕容超

北燕錄

馮跋

馮宏

西秦錄

乞伏國仁

乞伏乾歸

乞伏熾盤

乞伏慕末

夏錄

赫連勃勃

赫連昌

十六國春秋 目錄

赫連定

十六國春秋

魏 崔 鴻 撰

前趙錄

劉淵

劉淵字元海。新興匈奴人。先夏后氏之苗裔。曰淳維。世居北狄。千有餘歲。至冒頓。襲破東胡。西走月氏。服丁零。內侵燕代。控弦四十萬。漢祖患之。使劉敬奉公主以妻冒頓。約爲兄弟。故子孫遂冒姓爲劉氏。建武初。入居西河美稷。后漢中年。單于羗渠使子於扶羅將兵助漢。討平黃巾。會羗渠爲國人所殺。於扶羅以其衆留漢。自立爲單于。屬董卓之亂。寇掠太原河東。屯於河內。於扶羅死。弟呼廚泉立。以於扶羅子豹爲左賢王。卽元海之父也。魏武分其衆爲五部。以賢王豹爲左部帥。其餘部帥皆以劉氏爲之。太康中。改置都尉。雖分屬五部。皆家于晉陽汾澗之濱。豹妻呼延氏。魏嘉平中。祈子於龍門。有一白魚。頂有一角。軒鬣躍鱗。而至祭所。久之乃去。巫覡皆異之。曰此吉祥也。其夜夢所見魚變爲人。左手把一物。大如雞子。光景非常。授呼延氏。曰此是日精。服之生貴子。寤以告豹。豹曰吉徵也。自是十五月而生淵。淵生。左手有文曰淵海。遂以爲名。幼而好學。不舍晝夜。嘗謂同門生朱紀范隆等曰。吾每觀書傳。常鄙隨陸之無武。絳灌之無文。一物之不知。固君子耻之也。二生遇高皇。不能建封侯之業。兩公屬太宗。不能開庠序之美。惜哉。於是文學武事。並皆工絕。猿臂善射。膂力過人。身八尺四寸。鬚長三尺餘。當心有赤毫毛三根。長三尺六寸。

太原王渾虛襟友之。命子濟拜焉。咸熙中爲侍子。在洛陽。晉文帝深待之。時東萊王彌等皆憑結。渾又屢言之。晉帝召見與言。大悅之。后謂王濟曰。劉元海容貌風儀。譏談鑒智。雖金日磾無以加也。會父豹卒。帝以淵代爲左部帥。轉寧朔將軍。監五部軍事。大安中。惠帝失政。諸王迭相殘廢。州郡奸豪所在蜂起。從祖北部都尉左賢王劉宣等議曰。今司馬氏骨肉相殘。興復在此時矣。左賢王淵姿器絕人。幹宇超世。天若不恢崇單于。終不虛生此人也。於是共推劉淵爲大單于。劉淵曰。當爲崇岡峻阜。何能爲培塿乎。夫帝王豈有常哉。大禹生於西戎。文王生於東夷。顧惟德所授耳。今見衆十餘萬。皆一當晉十。鼓行摧亂。晉猶拉枯耳。上可成漢高之業。下不失爲魏武。何呼邪韓足道哉。宣等稱善。元熙元年。遷於左國城。晉人東附者數萬。宣等上尊號。淵曰。今晉氏猶在。四方未定。可仰尊高祖法。且稱漢王。權停皇帝之號。待宇宙混一。當更議之。十月。爲壇南郊。卽漢王位。改晉永興元年爲元熙元年。大赦天下。追尊劉禪爲孝懷皇帝。立高祖以下三祖五宗之神主而祭之。置百官。以劉宣爲丞相。拜授各有差。四部之東萊王彌起兵。青徐遣使來降。拜鎮東大將軍。青州刺史東萊郡公。四月。汲桑叛。自稱趙王。選置州郡。十一月。石勒及胡部等帥衆來降。永鳳元年。七月。鳳凰集于蒲子。丞相劉宣等六十四人上尊號。十月。僭卽皇帝位于南郊。大赦。改元。以衛軍和爲大將軍。撫軍總爲車騎大將軍。建武。曜爲龍驤大將軍。河瑞元年。遷都平陽。汾水得玉璽。大赦。改元。二年。以大司馬梁王和爲皇太子。八月。淵寢疾。以劉洋爲太尉。延年爲太宰。司徒總爲大司馬。大單于。並錄尙書事。置單于于平西。薨于光極殿。太子和卽位。聽自西明門。攻斬和于西室。九月。葬淵于永

光陵諡曰光文皇帝。廟號高祖。

劉聰

劉聰字元明。一名載淵。第四子。母張夫人。孕夢日入懷。寤而告淵。淵曰吉徵也。自是十五月而生聰。夜有日光之異。左耳有一白毫。長二尺餘。幼而聰悟。究通經書百家之言。孫吳兵法。靡不誦之。猿臂善射。彎弓三百斤。膂力驍捷。冠絕一時。永嘉四年。僭卽帝位。于光極前殿。大赦。改元光興元年。以衛尉呼延晏爲使持節前鋒大都督。配禁兵二萬七千。自宜陽入洛川。命東萊王彌劉曜及鎮軍石勒進軍會之。晏比及南王師。前后十二敗晉師。長驅圍洛陽。陷之。聰兵大掠。幽晉帝于端門。害太子及百官已下三萬餘人。於洛水北築爲京觀。遷帝及太后侍中庾珉等于平陽。大赦。改元嘉平元年。二月內。晉帝進號儀同三司。會稽郡公聰引帝入讎。謂曰。卿爲豫章王時。朕曾與王武子相造。武子示朕於卿。卿言聞其名久矣。以卿所作樂府歌文示朕。謂朕曰。聞君善爲辭賦。試爲看之。朕時與武子俱爲盛德頌。卿稱善久之。又引朕射于皇堂。朕得十二籌。卿與武子俱得九籌。卿贈朕柘弓銀硯。頗憶否。帝曰。臣安敢忘之。但恨爾日不早識龍顏耳。聰曰。卿家骨肉相殘。何其甚也。帝曰。此殆非人事。皇天之意也。大漢將應乾受曆。故爲陛下自相驅除耳。且臣家若能奉武皇之業。九族敦睦。陛下何由得之。三年春正月。宴于光極前殿。逼晉帝行酒。庾珉王雋等起而大哭。聰惡之。二月丁未。懷帝崩于平陽。於是誅珉等。三月立貴嬪劉氏爲皇后。四月。愍帝卽位於長安。車騎曜等攻長安。河東地震。雨于平陽。建元元年正月。黑霧四塞。人如黑。五日而止。辛酉時。日落。

地三月相承出於西方東行平陽地震崇明觀陷爲池水赤如血赤氣至天有赤龍奮迅而去流星起于牽牛入紫微龍形逶迤其光照地落于平陽北十里視之則肉臭聞于平陽長三十步廣二十七步肉旁常有哭聲晝夜不止聰甚惡之癸未劉后產一蛇一虎各害人而走尋之不得頃之見在隕肉之旁己丑劉氏卒乃失此肉哭聲亦止十一月以晉王粲爲四相大單于總百揆十二月宣光陵石人皆行數步宮中鬼哭聲武庫陷入地一丈五尺聰自去冬至是遂不復受朝賀軍國之事一決于粲立市於后庭與宮人宴戲或三日不醒秋七月河東大蝗唯不食粟豆司隸靳華率部民收而埋之哭聲聞於十餘里后乃鑽土飛出復食黍豆大司馬曜攻陷長安外城九月犬與豕交于宮門有豕著進賢冠昇聰御坐犬冠武冠帶綬與豕並昇俄而鬪死殿上宿衛莫有見其入者長安饑甚死者過半麴允爲粥以攻帝膳帝泣曰今窘厄如此外無救援勢不自知乃使侍中宋儆奉牋降曜敝隨使者至帝肉袒牽羊與櫬墜壁出降東門曜受壁焚櫬遷愍帝及司徒梁汾驃麴允等諸臣百餘人至於平陽聰臨光極殿帝稽顙與麴允伏地大哭扶不能起聰大怒允自殺以帝爲光祿大夫懷安侯以大司馬曜假黃鉞大都督陝西諸軍事太宰秦王二年正月東平王約卒十一月聰校獵上林以晉帝行車駕大將軍戎服執戟前導行三驅之禮觀者皆指帝曰此故長安天子聚而觀之故老亦有悲泣者十二月大饗于光極前殿聰欲觀晉臣之意使帝行酒洗爵更衣使帝執蓋多有涕泣或有失聲者尙書郎辛賓起而抱帝大哭引出斬之戊戌愍帝崩於平陽三年聰所居螽斯則百堂災焚其子會稽王哀已下二十有一人聰聞哀塞自此鬼哭宮中至

于九月夜聲不絕。四月尙書令王監崔懿之等極諫。聰大怒。收監等殺之。秋七月。鬼哭於光極殿。聰見東平王約甚惡之。徵秦王曜爲丞相。錄尙書事。固辭。仍以丞相領雍州牧。靳準爲大司空。領司隸校尉。癸亥。薨于建始殿。甲子。粲卽位。大赦。改元漢昌。葬宣光陵。諡曰武帝。廟號烈宗。八月。以丞相曜爲相國。大都督。司空靳準爲大將軍。領尙書事。粲荒耽酒色。遊宴后庭。軍國之事。一決於準。準遂勒兵入宮。執粲數而殺之。追諡靈帝。劉氏無少長。男子盡刑于市。發掘二陵。焚燒宗廟。鬼大哭。聲聞百里。準自號漢大王。置百官。遣使稱藩于晉。相國曜自長安赴難。

永嘉元年十二月。大將軍東平王約卒。一指猶煖。遂不殯斂。至甲戌。乃蘇。言見淵於不周山。經五日。遂復從。至崑崙山。三日而復。反於不周。見諸王公卿將相死者悉在。大有人民宮室壯麗。號曰蒙珠。禹國。淵謂約曰。東北遮須夷國無主。久待汝父爲之。汝父二年當來。后國中。大亂相殺害。吾家死亡略盡。但可永明輩數十人在耳。汝但還。后年當來見。汝不遲不久。約拜辭而歸。道過一國。曰。猗尼渠。余國。引約入宮。與皮囊一枚。曰。爲吾遺漢皇帝。約辭而歸。謂約曰。劉郎。后年來必見過。當以女相妻。約歸。置皮囊於機下。俄而蘇。謂左右曰。機上取囊來。左右取得。開有一方白玉。題文曰。猗尼渠。余國。天王。敬信遮須夷國。天王。歲在攝提。當相見。馳使奏呈。聰曰。若當如此。吾不懼死也。及聰以戊寅歲薨。與此玉并葬焉。

劉曜

劉曜。字永明。淵之族子。少孤。見養於淵。幼而聰慧。性拓落高亮。與衆不羣。鐵厚一寸。射而洞之。身長九尺。

三寸手垂過膝。生而眉白。目有赤光。鬚不過百餘根。皆長三尺。光初元年。十月太保呼延晏等自平陽來奔。上尊號於曜。僭卽皇帝位。十二月。斬準左右軍騎喬太王騰等。殺準。奉六醜來降。二年夏四月。徙都長安。立子熙爲皇太子。六月。繕宗廟社稷。南北郊于長安。令曰。蓋王者之興。必禘始祖。我皇家之先。出自夏后。居于北夷。世跨燕朔。光文以漢有天下。歲久恩德結于庶民。故立漢祖宗之廟。以懷民望。昭武因循。遂未悛革。今欲除宗廟。改國號。御以大單于爲太祖。其議以聞。於是太保呼延晏等議曰。今宜承晉。母子傳號。以光文本封盧奴中之屬城。陛下勳功茂於平洛。終於中山。中山分野。屬大梁。趙也。宜革稱大趙。遵以水行。曜從之。於是以冒頓配天。淵配上帝。三年五月。西明門內。大樹風吹折。經一宿。樹撥撥變爲人形。髮長一尺。鬚眉三寸。皆黃白色。有斂手之狀。亦有兩腳着履之形。唯無目鼻。每夜有聲。十日而生柯條。遂爲大樹。枝葉甚茂。四年。將於霸陵西南營壽陵。侍中喬豫和苞上疏諫曰。臣等伏聞勅旨。將營建壽陵。周圍四里。下深二十五丈。以銅爲棺。椁黃金飾之。臣聞堯葬穀林。市不改肆。顓頊葬高陽。下不及泉。聖王之於終也如是。秦始皇下鋼三泉。周輪七里。身亡之後。毀不旋踵。閻王之於終也如此。後喪亂以來。漢帝諸陵。咸見踐辱。唯霸陵獨全。此雖太宗之達。至然。抑亦釋之之功。興亡奢儉。爛然於前。唯陛下覽之。曜大悅。終南山崩。所得白玉方尺。有字曰。皇王皇亡。敗趙昌。以爲已瑞。郡臣咸賀。中書監劉均曰。山崩石壞。國傾民亂。皇王皇亡。敗趙昌者。此言皇室將爲趙所敗。趙因之而昌。大趙都於秦雍。而勒跨全趙。趙昌之應。常在石勒不在我也。曜憊然改容。五年。曜后羊氏卒。故晉惠后也。洛陽之陷。納之。六年正月。天裂。廣一丈餘。長

五十丈。十一年七月石虎率衆四萬人寇擾河東。進蒲坂。曜選中外精銳自潼關北濟。虎懼。引師而還。曜追而敗之。枕尸一百餘里。虎奔朝歌。遂攻石生於金墉。分遣諸將攻汲郡河內。十二月勒自帥衆拒之。陣於洛西。曜性少酌酒。末年尤甚。將戰。飲數斗。常乘赤馬。無故蹶頓。乃乘小馬北出。復飲斗餘。至西陽門。搗陣。就平。勒將石堪因而乘之。師遂大潰。曜昏醉奔退。而馬陷石渠。墜於冰上。爲堪所執。勒將還襄國。喻曜使與太子毗書。令速降。曜但勅毗與諸臣匡維社稷。勿以吾易意。建平末。爲勒所殺。十二年正月太子毗。太司馬南陽王胤等。議欲西保秦州。遂相率奔上邽。石虎乘勝追戰。枕尸千里。上邽潰。虎執毗及王公已下三千餘人。皆殺之。自劉淵建號西河。至是二十有六載。